

LETSATSI LA MATJHABA LA BOLAODI BA THEPA MEEDING 2018

Cape Town, 26 Pherekong 2018 - Mekgatlo ya Bolaodi ba Thepa Meeding ho phatlalla le lefatshe kajeno e tlotile banna le basadi ba sireletsang madiboho a rona le ho thusa tsa kgwebisano. Selemo ka seng Letsatsi la Matjhaba la Bolaodi ba Thepa Meeding (ICD) le tshwarwa ka la 26 Pherekong e leng letsatsi leo Lekgotla la Tshebedisano ya tsa Bolaodi ba Thepa Meeding (CCC) le ileng la kgakola seshene ena ka lona ka 1953.

Mookotaba wa Letsatsi la Matjhaba la Bolaodi ba Thepa Meeding (ICD) ka 2018, le kgethilweng ke Mokgatlo wa Lefatshe wa Bolaodi ba Thepa Meeding (WCO), ke "A Secure business environment for economic development" / "Tikoloho e sireletsehileng ya kgwebo bakeng sa ntshetsopela ya ikonomi".

Ditshebeletso tsa Lekgetho tsa Afrika Borwa le bile le mokgahlelo ona wa lenaneo Polokelong ya Mmuso e sa tswa ntjhafatswa e mane Cape Town, mme Khomeshenara, Tom Moyane, o tshetlehile puo ya sehloho teng.

"Mookotaba wa selemo sena o tobile ho hlokomedisa bohle hore re netefatse hore ho ba le tikoloho e loketseng kgwebo, hore dienjene tsa ikonomi di tsebe ho ba le seabo ho yona le hore e kgole molemo ho tswa kgwebisanong ya matjhaba", ho rialo Khomeshenara.

"Bolaodi ba Thepa Meeding bo ka thusa ho theha tikoloho e ntle ka ho netefatsa botsitso, ho tseba tse ka etsahalang, ho tjhorisa metjha, ho lwantshana le manyofonyofo, ho ntlafatsa botshepehi le ho netefatsa pebofatso ya motsamao."

"Bolaodi ba Thepa Meeding bo ka ba le seabo tikolohong e bolokehileng ka ho etsa se lebelletsweng ho bona ho netefatsa lethathama la phepele le sireletsehileng, ho ntlafatswa ha bokgoni ba bona ba ho thibela kgwebisano e seng molaong le e kotsi le ho lwantshana le diketsahalo tse kang ho fumantshwa tjehelele ha tse mabapi le botlokotsebe le boferekanyi."

"Bolaodi ba Thepa Meeding bo ka ba le kabelo tikolohong e seng leeme le e tswelang ka ho dula e tsepame ho tobana le diketsahalo tse kang ho tlotha ha melao ya boitsebelo ba boinahanelo, ho mokolwa ka sepheo sa ho qoba tefo ya dikgafa mmoho le ho qoba ho tsebahatsa boleng le moo dithoto di tswang teng," o itse jwalo.

O ekeditse ka hore mokgatlo ona o tla tsitlallela le ho netefatsa hore o tswela pele ho ananelwa e le tshebeletso ya maemo a lefatshe le ho ba le seabo ho ntlafatsweng ha kgwebisano le tshebetso e ntle ya ikonomi ya Afrika Borwa. Mehato e kang ya Tekanyo ya Tshebetso ya Banka ya Lefatshe e se e ananetse tshebetso e ntle ya Afrika Borwa mabapi le sena mme SARS e tla tsitlallela ho ntlafatsa sena, o itse jwalo.

"Ke kgolwa hore sena se tla fihlellwa ka boiteko ba rona ba ho ntlafatsa tshebeletso, botsamaisi ba boleng, ho tsetela bathong ba rona, ho ntshetsa pele boetapele ba rona le selekane le bakgathatema ba rona."

O ekeditse ka hore: "Jwalo ka boetapele ba bophethahatsi SARS, re thaba mmoho le WCO mme re ananela mookotaba ona. Re tla tswela pele ho ntshetsa pele maikemisetso a rona a ho ba le tikoloho e kgontshang le e bolokehileng bakeng sa kgwebo molemong wa kgwebisano ya matjhaba.

Ofisiri ya Phethahatso e ka Sehloohong ya Bolaodi ba Thepa Meeding, Jed Michaletos, o buile ka ho qalwa ha melao e metjha ya sa Bolaodi ba Thepa Meeding ka tshebediso ya Lenaneo le Letjha la Melao ya Bolaodi ba Thepa Meeding (NCAP), o boletse hore ena ke projeke e kgolohadi SARS ha jwale, nako ya ho phethahatswa ha yona e tswella ho fihlela ka 2025. "Hang feela ha Mealo ena e metjha e phethahaditswe, e tla fetola tsela eo re sebetsang ka yona mona SARS haholo feela."

O bile a hlalosa hore ho ntjhafatswa ha Polokelo ya Mmuso e Cape Town – eo e leng ya pele ho tse ngata naheng – ke karolo ya tse tlang pele ho mawala a kakaretso a selemo sena. O boletse hore ba motlotlo haholo ka tse ding tsa diphetoho tseo ba di qadileng tse akareditseng metjha e ntlafaditsweng ya tshireletseho mmoho le mokgwatshebetso o ntlafaditsweng wa ka hare wa botsamaisi ba lesedi o tlang ho kgona ho beha leihlo dithoto tsohle tse kenang le tse tswang polokelong.

"Sena se tla re kgontsha ho sebetsana ka matla le dithoto tse seng molaong le tsa mokokotelo, tse nang le seabo ikonoming e seng molaong mmoho le tahlehelong ya tjelele ya mmuso."

*CCC e ananetse lebitso lena la tshebetso, la Mokgatlo wa Lefatshe wa Bolaodi ba Thepa Meeding / World Customs Organisation (WCO) ka 1994. Selemo ka seng, letsatsi lena le ketekwa ho phatlalla le lefatshe mme mookotaba o kgethwa ke Bongodi ba WCO mme bo tsebiswe Ditho tsohle tse 180 tsa WCO.